

Ein har gått gjennom og tilpassa forskrifta til dagens situasjon.

Det som er av vesentleg endring er i § 1, 3 avsnitt: *Føresegnene gjeld ikkje kjemisk/biologisk minireinseanlegg der inngått serviceavtale er sendt til kommunen og årleg servicerapport er sendt til kommunen innan 31. desember kvart år.*

Det er og mindre justeringar forøvrig i teksten.

Framlegg til endra føresegn datert 13.11.2018:

FØRESEGNER FOR TØMMING AV SLAMAVSKILJARAR, TETTE TANKAR M.V. GJELDANDE FOR OSTERØY KOMMUNE I MEDHALD AV LOV AV 13. MARS 1981 NR. 6 OM VERN MOT FORUREINING OG OM AVFALL (FORUREININGSLOVA) § 26 TREDJE LEDD, § 30 ANDRE OG TREDJE LEDD OG § 34.

Vedtekne av Osterøy heradsstyre 11.02.1987, saksnr. 9/87 med verknad frå vedtaksdato.
Endringar vedtekne av Osterøy Heradsstyre 17.06.1992, saksnr. 93/92 med verknad frå 01.09.1992. Endringar vedtekne av Osterøy heradsstyre, saksnr. /18 med verknad frå 01.01.2019.

§ 1 Verkeområde for føresegnene

Føresegnene gjeld for Osterøy kommune, og fastset reglar for tømning av alle slamavskiljarar og andre slamtankar. Alle naudsynte slamavskiljarar/-tankar blir omfatta av ordninga.

Som naudsynt slamavskiljarar tette slamtankar m.v. blir rekna:

Septiktankar og andre slamtankar for avslamming av sanitært avlaupsvatn der tanken ikkje er tilknytt offentleg avlaupsnett med reinseanlegg, eller som av andre årsaker blir rekna som naudsynte. Føresegnene gjeld og for tette oppsamlingstankar med ubehandla avlaupsvatn.

Føresegnene gjeld ikkje kjemisk/biologisk minireinseanlegg der inngått serviceavtale er sendt til kommunen og årleg servicerapport er sendt til kommunen innan 31. desember kvart år.

Føresegnene gjeld ikkje oljeutskiljarar, oppsamlingstankar for husdyrgjødsel, industriavlaupsvatn eller liknande ikkje-sanitært avlaupsvatn.

Føresegnene gjeld ikkje ved følgjande forhold:

1. I område der eigedomen er direkte tilknytt offentleg avlaupsnett med renseanlegg.
2. Eigedomar der:
 - a) Septiktanken ligg meir enn 100 m frå kjørbar bil/traktorveg, (off. eller privat). Teknisk etat saman med renovatør vurderer om vegen er kjørbar
 - b) Septiktanken ligg lågare enn 25 meter i høve til kjørbar bilveg.

§ 2 Utkopling av slamavskiljarar / - tankar

Kommunen kan, i medhald av forureiningslova § 26, krevja at unaudsynte slamavskiljarar blir utkopla (slamavskiljarar tilkopla renseanlegg).

§ 3 Tømming av slamavskiljarane

For eigedomar med fast busetnad eller næringsverksemd skal slamavskiljaren tømmast annakvart år.

For eigedomar med fritidshus skal slamavskiljar tømmast kvart 4 år. Heimelshavar/huseigar kan inngå skriftleg avtale med kommunen om tømming annakvart år, med krav om auka gebyr for tømming. Auka gebyr for tømming skal vere dobbel årsavgift for hytte/fritidshus.

Tankar som er mindre enn 1 kubikkmeter, skal ikkje reknast som septiktank, og skal heller ikkje tømmast av kommunen.

Tømming av tette oppsamlingstankar for septiktank skal følgje vanleg tømmerutiner for området. Er det trong for å tømme oftare enn dette tilseier, eller til anna tid, må abonnenten sjølv ordne med og betale for dette. Slammet må leverast til kommunalt deponi eller til andre avtala oppsamlingsplassar. Det same gjeld for unaudsynte slamavskiljarar.

I særlege tilhøve kan kommunen fastsetja anna tid mellom tømmingane.

§ 4 Abonnentane sine plikter

Abonnenten skal syta for at anlegga som skal tømmast er lett tilgjengeleg for tømming med bil eller traktor.

Overdekking av kumlokk med snø, is, jord e.l. skal fjernast av abonnenten før tømming skjer. Dersom renovatør må kjøra ekstratur på grunn av at abonnenten ikkje har utført sine plikter, må abonnenten betala ekstra gebyr i samsvar med regulativ for slamtømming.

Renovatøren har rett til å plassera naudsynt utstyr på eigedomen for å få utført tømminga.

§ 5 Kommunen sine plikter

Kommunen, eller den kommunen gjev løyve til, skal syta for tømming av slamavskiljarar, tette slamtankar m.v. som desse føresegnene gjeld for.

Tømming blir utført etter reglar fastsett etter § 3.

Skriftleg varsel om tømming skal gjevast minst ei veke før tømming skjer til heimelshavar/eigar. Tømming skal utførast slik at oppsitjarane ikkje vert unaudsynt plaga av støy eller lukt. Anlegget skal etterlatast i lukka stand. Grinder, portar og dører skal lukkast, eventuelt låsast.

Kommunen, eller den kommunen gjev løyve til, er pliktig å ta imot alt kloakkslam i kommunen.

§ 6 Gebyr

Gebyret er knytt til kvart enkelt hus som er i bruk som bustad, fritidshus eller næring så langt det ikkje er gjort unntak i § 1.

Alle som vert omfatta av ordninga, pliktar å betala eit årleg gebyr fastsett av kommunen etter forureiningslova § 34. Dette gjeld sjølv om arbeidet ikkje er utført dersom vedkomande abonnent har fått tilbod om tømning, men av ulike grunnar ikkje har nytta seg av det.

Nekta tilkomst for renovatør gjev ikkje fritak for avgift, sjølv om det er naboeigedomen som stenger tilkomst.

Dei som har WC/innlagt vatn men ikkje septiktank, skal betale slamavgift frå det året dei vert pålagde å søkja om utsleppsløyve. Dette gjeld og for dei som har ulovleg utslepp til husdyrgjødselkum eller liknande.

Abonnentar som ynskjer tømning utanom kommunale tømmerutiner etter § 3, betaler direkte til firmaet som utfører tømninga. Dette gjeld og for unaudsynte tankar og tette oppsamlingstankar.

Avfallsgebyr med renter og kostnader er sikra med lovfastsett pant etter pantelova §6.1. Om renteplikt ved for sein betaling og inndriving av avfallsgebyr gjeld reglane i lov av 5.juni 1970 nr. 29, om eigedomsskatt til kommunen §§ 26 og 27 tilsvarande.

§ 7 Klage

Pålegg gjeve i medhald av desse føresegnene kan påklagast til formannskapet.

§ 8 Unntak

Kommunen kan, etter grunngjeven søknad, gje unntak frå desse føresegnene og unnta einskilde eigedomar frå ordninga etter følgjande retningsline:

Etter skiftleg søknad kan rådmannen gje fritak frå slamavgift og tømning ved desse tilhøva:

- Huseigar gjev skriftleg førehandsmelding til kommunen om at bygningen er fråflytta og ikkje vert brukt som bustad eller fritidshus. Når bygningen har stått ubrukt i 12 samanhengande månader kan huseigar søkje om utsett tømning og fritak for betaling. Søknaden skal vere grunngjeven.
- Avgift skal betalast på vanleg måte og så eventuelt refunderast.

Rådmannen kan ved spesielle høve gje fritak frå tømning utan at det vert gjeve fritak frå avgifta.

§ 9 Straff

Brot på føresegnene blir straffa med bøter etter forureiningslova § 79, 2. ledd.

§10 Iverksetjing

Desse føresegnene vert gjort gjeldande frå 01.09.1992.